



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA KUMI

Kikao cha Sita – Tarehe 16 Mei, 2018.

Kikao Kitaanza Saa 3.00 (Tatu) Asubuhi
na Dua itasomwa.

I. MASWALI:

Ofisi ya Rais, Tawala za Mikoa, Serikali za Mitaa na Idara Maalum za SMZ:

228. MHESHIMIWA ALI SULEIMAN ALI (Jimbo la Kijitoupele) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Mkoa wa Mjini Magharibi uliwakabidhi vifaa Mabaraza ya Shehia, kwa ajili ya kufanya usafi katika Shehia zao. Tatizo kubwa lililojitokeza katika majaa mbali mbali, hasa Magharibi "B" ni kukosekana kwa magari ya kuzolea taka katika majaa hayo. Kwa kuwa tatizo la taka katika majaa mbali mbali ni kero, na pia ni hatarishi kwa maradhi ya mripuko.

Je, Wizara itachukuwa hatua gani ili kuziondoa taka hizo.

Ofisi ya Rais, Katiba, Sheria, Utumishi wa Umma na Utawala Bora:

6. MHESHIMIWA SHEHE HAMAD MATTAR (Jimbo la Mgogoni) - Atamuuliza Mheshimiwa Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora:

Kwa kuwa Wizara yako inacho kitengo cha ufuatiliaji na tathmini katika Taasisi za Serikali.

- (a) Je, tokea Mhe. Rais wa Zanzibar na Mwenyekiti wa Baraza la Mapinduzi apandishe kima cha chini cha mishahara na kufikia shilingi 300,000, ni tathmini ya kiwango gani imefanyika baada ya kupandishwa mishahara juu ya utendaji wa kazi katika ofisi za Serikali hapa Zanzibar.
- (b) Je, ni Taasisi ngapi imeweza kuzipitia kwa lengo la kukagua, kuona na kutathmini uwajibikaji kwa watumishi wa Umma.

Wizara ya Elimu Na Mafunzo ya Amali:

40. MHESHIMIWA ALI KHAMIS BAKAR (Jimbo la Tumbe) - Atamuuliza Mheshimiwa Waziri wa Elimu na Mafunzo ya Amali:

Serikali ya Mapinduzi ya Zanzibar inastahili pongezi kwa kutoa mikopo ya elimu ya juu, kwa wanafunzi wapya na wa zamani ambapo jumla ya wanafunzi wapya 1,461 wamefungishwa mikataba ya mikopo kwa mwaka 2017/2018 na wanafunzi 2,582 wanaoendelea wamefanyiwa malipo.

- (a) Je, ni sababu gani zilizopelekea kusitishwa mikopo kwa elimu ya juu kwa wafanyakazi wa Serikali wanaojiendeleza.
- (b) Je, ni lini tatizo la ufinyu wa jengo la Ofisi ya Bodi ya Mikopo litatatuliwa.
- (c) Je, ni sababu zipi zilizopelekea kucheleweshwa kwa fedha kwa baadhi ya wanafunzi walioomba mkopo hasa kutoka vyuo vya nje ya Zanzibar.

223. MHESHIMIWA ALI SULEIMAN ALI (Jimbo la Kijitoupele) - Atamuuliza Mheshimiwa Waziri wa Elimu na Mafunzo ya Amali:

Kwa nia njema kabisa, Serikali imewahamasisha viongozi na wananchi kuchangia madawati kwa ajili ya kuondoa tatizo la wanafunzi kukaa chini wakati wa masomo. Kwa kuwa Serikali iliunda Kamati, kwa ajili ya kukusanya michango mbali mbali nchini.

Je, Waziri, ni kiasi gani cha fedha kimepatikana hadi hivi sasa.

Wizara ya Kazi, Uwezeshaji Wazee, Wanawake na Watoto:

128. MHESHIMIWA SULEIMAN SARAHAN SAID (Jimbo la Chake Chake)- Atamuuliza Mheshimiwa Waziri wa Kazi, Uwezeshaji Wazee, Wanawake na Watoto:

Pamoja na Serikali kuweka mifumo ya kulinda haki za wanawake na watoto, kumekuwa na tatizo la wanawake wanapopewa mimba nje ya ndoa na wanaume wanaowapa mimba kuwatelekeza mama pamoja na watoto na kuwaachia ulezi wa watoto hao.

- (a) Je, kwanini mama ndio anaachiwa alee mtoto peke yake.
- (b) Kwa kuwa mtoto aliyezaliwa na mama ambaye hakuolewa kwa mujibu wa dini ya Kiislamu mtoto huyo hana haki ya kumrithi baba huyo, Je kwa Serikali hakuna haki ya mtoto yule kumrithi baba aliyempa mwanamke ujauzito.
- (c) Katika nchi au maeneo mengine watoto kama hao huenda Mahakamani kudai haki zao na kulipwa haki zao vipi hapa Zanzibar utaratibu huo upo.

Wizara ya Ardhi, Nyumba, Maji na Nishati:

28. MHESHIMIWA MUSSA FOUH MUSSA (Jimbo la Kiwani) - Atamuuliza Mheshimiwa Waziri wa Ardhi, Nyumba, Maji, na Nishati:

Wizara ya Ardhi, Nyumba, Maji na Nishati kupitia Kamisheni ya Ardhi katika Mwaka wa 2017/2018 ilipanga kutayarisha vitambulisho vya umiliki wa matumizi ya ardhi za eka tatu tatu.

- (a) Je, Waziri hili unalifahamu.
- (b) Je, limefikia wapi katika utekelezaji wake.

Wizara ya Biashara na Viwanda:

103. MHESHIMIWA OMAR SEIF ABEID (Jimbo la Konde)- Atamuuliza Mheshimiwa Waziri wa Biashara na Viwanda:

Kwa kuwa Kampuni ya Jabal Kilimanjaro iliyopo Dubai imeingia mkataba na Serikali ya Mapinduzi ya Zanzibar kupitia taasisi ya viwango, ambapo miongoni mwa majukumu ya Kampuni hiyo ni kufanya ukaguzi wa magari yanayoingia Zanzibar kutoka nchi kama Uingereza, Japan, Hong kong, Ghana na kwengineko.

- (a) Je, katika nchi hizo wapo mawakala wao wanaofanya “*inspection*” ya magari kabla ya kusafirishwa kuletwa Zanzibar na kama zipo kampuni hizo zinaitwaje na Afisi zao zipo wapi kwenye nchi zao.
- (b) Je, ZBS huwa wanachukua hatua gani kwa wafanyabishara ambao wanakwepa kufanyiwa ukaguzi “*inspection*” ya magari kabla ya kuingiza hapa nchini.
- (c) Je, magari yanayoruhusiwa kuingizwa nchini hivi sasa yanatakiwa yawe ya miaka mingapi kutumika.

Wizara ya Ujenzi, Mawasiliano na Usafirishaji:

94. MHESHIMIWA BAHATI KHAMIS KOMBO (Jimbo la Chambani) - Atamuuliza Mheshimiwa Waziri wa Ujenzi, Mawasiliano na Usafirishaji:

Kwa kuwa eneo la Chwaka Kiwani ni sehemu ambayo wananchi wake ni wakulima na wazalishaji wa mazao ambayo kupelekwa Chake Chake na Mkoani huku wakilazimika kutumia magari ya ng'ombe na punda.

- (a) Je, Serikali itawasadia vipi wananchi hao kutokana na ukosefu wa usafiri wa uhakika wa kusafirishia mazao.
- (b) Ni lini Waziri atafanya ziara ya kwenda kuiona barabara hiyo.

196. MHESHIMIWA MACHANO OTHMAN SAID (Jimbo la Mfenesini) - Atamuuliza Mheshimiwa Waziri wa Ujenzi, Mawasiliano na Usafirishaji:

Kwa muda mrefu wananchi wa vijiji vya Mwakaje, Mwachealale, Kitundu, Bumbwisudi na Mkanyageni katika Manispaa ya Magharibi "A" wamekuwa wakikabiliwa na tatizo la mawasiliano duni ya mitandao ya simu za mkononi, hivyo kusababisha kudorora kwa huduma muhimu za jamii katika maeneo hayo.

- (a) Je, kwa kuwa tatizo hilo ni la muda mrefu ni sababu gani zinazopelekea kuwepo kwa tatizo hilo katika maeneo hayo.
- (b) Kwa kuwa wananchi wa maeneo hayo wanapata tabu sana ya mawasiliano Je, Serikali ina mpango gani wa kulitua tatizo hilo.

Wizara ya Afya:

117. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Afya:

Katika kupambana na majanga ya maradhi mbali mbali yaliyojitokeza katika visiwa vyetu vya Zanzibar, yapo maradhi yanayotibika na yasiyotibika lakini mengine huhitaji mgonjwa kufanyiwa matibabu kila wiki, mwezi au miezi mitatu au sita hasa kusafisha damu kwa wagonjwa wa figo (dialysis).

- (a) Je, Serikali imejipangaje katika suala la kusafisha damu kwa wagonjwa wa figo ambao hupata tabu na gharama kubwa kwenda Bara kutafuta huduma hiyo.
- (b) Je, kwa sasa huduma hiyo kwa Zanzibar inapatikana katika hospitali gani.
- (c) Je, Serikali ina mpango gani wa kupeleka huduma hizo katika hospitali za Wilaya au za Mikoa.

II. HOJA ZA SERIKALI:

Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Kwamba Baraza hili lijadili Makusudio na Shabaha zilizomo katika Makadirio ya Mapato na Matumizi ya Ofisi ya Rais, Tawala za Mikoa, Serikali za Mitaa na Idara Maalum za SMZ kwa mwaka 2018/2019.

Zanzibar,
16 Mei, 2018.

(Raya Issa Msellem)
KATIBU WA BARAZA.